



Gipuzkoa emakumeen aurkako sexu indarkeria matxistarik gabeko jaien alde

Gipuzkoako Foru Aldundiak hausnarketa prozesu bat jarri du abian lurraldeko udalerriekin, jaiak emakumeen aurkako indarkeria matxistarik gabeko gozamen eta ospakizun gune bat izan daitezen.

Euskal administrazio publikoek eta mugimendu feministak –askotan koordinatuta– hainbat ekimen garatu dituzte azken hamarkadan, jaietan emakumeen aurka egindako sexu indarkeria lantzeko. COVID-19aren pandemiak eragindako osasun larrialdiari aurre egiteko ezarri diren murrizketen ondorioz bi urte igaro ditugu jai publiko eta sozial gehienak ospatu ezinik, eta orain badatoz berriro udako jaiak Euskal Herriko udalerrri gehienetara.

Kontuan hartuta

- Jaien testuinguruak jokabidearen eta harremanen mugak urratzeko bidea ematen duten espazio ludikotzat hartzen direla.
- Urratze ludiko horiek ezin direla aitzakia izan gure udalerrietako jaietan emakumeen aurkako sexu indarkeria matxista legitimatzeko edo normalizatzeko.
- Eraso gehienak ez direla salatzen, biktimek badakitelako beren jokabidea epaituko dela, jasan duten delitua baino gehiago.
- Jaietako sexu indarkeria emakumeen askatasunaren, mugikortasunaren eta segurtasunaren aurkako eraso dela.
- Jaietako aisia eta gozamina emakumeen eskubidea dela, eta eskubide hori berdintasunean gauzatzeko aukera izan behar dutela.

Gipuzkoak bere gain hartzen du konpromiso hau

Emakumeen aurkako sexu erasoak jaien testuingurutik kanpo uzteko lan egitea, eraso horiek egiturazko indarkeria testuinguru batean puntualki gauzatzeko indarkeria matxista direla ulertuta; hau da, eraso horiek ez dituela festa giroak eragiten, baizik eta giro hori hartzen dela eraso egiteko aitzakiatzat.

Testuinguru horretan, gure **konpromisoa** politika argi batzuetan islatzen da, lau esparrutan:

Jaien antolaketa

Udalerrri guztietan jartzen ditugu abian gure herrietako jaiak planifikatzeko eta garatzeko lan espazioak. Konpromisoa hartzen dugu espazio horietan emakumeen aurkako sexu indarkeria matxista kontuan hartzeko, horri aurre egiteko neurriak hartzeko eta neurri horietan inplikaturik dauden gizarte eragileen konpromisoa bultzatzeko.

Emakumeen aurkako sexu indarkeria matxistaren inguruko sentsibilizazioa eta prebentzioa

Emakumeen eta gizonen berdintasunaren eta emakumeen aurkako indarkeria matxista desagerraraztearen arloko esparru juridikoak aintzat hartuta, udalerriei dagokie emakumeen aurkako sexu indarkeria prebenitzeko sentsibilizazio kanpainak eta neurriak abian jartzea.

Esparru horretan, gure gain hartzen dugu eremu horretako mezuek eta ekintzek erasoan erantzukizuna erasotzaileengan jartzeko konpromisoa, eta biktimekin sinesgarritasuna eta emakumeek sexu askatasunerako eta jai espazioez gozatzeko duten eskubidea azpimarratzeko. Ildo horretan, emakumeei ez zaie erantzukizun mezurik edo zaintza



mezurik bidaliko, mezu horiekin indarkeria matxistaren funtzio soziala indartu baino ez baita egiten: emakumeak kontrolatzea.

Biktimentzako arreta

Jaietako sexu indarkeria matxistak ezaugarri bereziak ditu. Biktimentzat traumatikoak diren elementuez gain, badaude beste baldintza batzuk ere, hala nola gauaren eragina, herriko jaiak laneko jaiegunekin batera gertatzen direla, eta espazio publikoetan gerta daitezkeela: tabernetan, txosnetan...

Testuinguru horretan, neurriak hartzeko konpromisoa hartzen dugu, udaleko arreta zerbitzuak egoera horietara egokitu daitezen eta biktimek lehen mailako arreta egokia jaso dezaten, eskura dituzten zerbitzu, baliabide eta haiengana iristeko bide guztiak ezagutzeko aukera izan dezaten.

□ Erantzun publikoa: 0 tolerantzia emakumeen aurkako indarkeria matxistarekiko

Azken urteotan, erakundeek agerian utzi dute funtsezkoa dela indarkeria matxista baztertuko duen eta erasotzaileen zigorgabetasuna eta zilegitasuna geldiaraziko duen kultura sozial bat eraikitzea, mugimendu feministak hasitako hausnarketa kolektiboa bultzatuz eta zabalduz. Erakunde publikook eraikuntza horretan parte hartu behar dugu, horrelako erasoak gaitzesteko estrategia eta adierazpen publikoak sortuz.

Aldundiak eta Gipuzkoako udalerriek konpromisoa hartzen dugu emakumeenganako sexu indarkeria matxistaren aurkako gure jarrera publikoki adierazteko. Erantzun publiko horren printzipio gidariak hauek dira: emakumeei sinestea, haien borondatea errespetatzea eta biktimei ordaina ematea. Horretarako, edozein adierazpen publiko egin aurretik, funtsezkoa da emakumeek arreta egokia jaso dutela bermatzea.

Konpromiso partekatua

Aldundiak eta Gipuzkoako udalek, azken asteotan egindako lan prozesuaren ondoren, jaiak emakumeen aurkako indarkeria matxistarik gabe gozatzeko gune bihurtzeko ahal den guztia egiteko konpromiso partekatua berresten dugu.

Gizarte osoari dei egiten diogu sexu indarkeria matxistaren existentziaz jabetu dadin, eta pertsona bakoitzak, bere erantzukizunaren esparruan, konpromiso aktiboa har dezan indarkeria matxistarik gabeko jaien alde. Gure auzo eta udalerrietako jaiak indarkeria matxistarik gabeko ospakizun gune izan daitezen, eta haietan emakumeek askatasunez gozatu ahal izan dezaten aisialdiaz, ospakizunez eta gizarte harremanez.